



Prizidenti di Kámara Michelle Wu

Diskursu sobri Stadu di Sidadi • 19 di marsu di 2025

Bon noti, Boston!

Obrigada pa nos anfitrións na MGM Music Hall, y pa tudu nos intérpritis es noti li.

Governador Healey, Diputada Pressley, Prizidenti di Konselhu Louijeune, Prizidenti Robinson, Prizidenti di Kámara Janey, y tudu nos funsionárius munisipal, stadual y distrital: Nhos parseria ta pusibilita nos trabadju. Obrigada.

Pa nos funsionárius munisipal: Na un altura en ki funsionárius públiku sa ta dispididu y ta dispristijiadu, nhos kontinua ta difende nos moradoris y ta lenbrá-nu kuzê ké un bon administrason. Obrigada pa izénplu ki nhos ta da tudu dia.

Pa nha família ki sta li prizenti es noti—nha maridu **Conor**; midjoris irmon más grandi, **Blaise** y **Cass**; y bebê **Mira**—ami é un mudjer di sórti; N kre nhos txeu.

Y pa povu di Boston: Obrigada pa ónra di faze es trabadju na nhos ladu.

Dos simana atrás, N bai pa D.C. pamódi Kongrésu tinha alguns pergunta sobri módi ki nu ta faze kuzas li na Boston.

É nha vós ki es obi na mikrofóni kel dia la, má é 700.000 vós ki da Kongrésu rispósta:

Kel-li é nos sidadi.

Ningen ka ta fla Boston módi ki nu debe kuida di nos gentis...nen rei, nen prizidentis ki ta pensa ma es é rei. Boston nase ta infrenta *bullies* (intimidadoris).

Na D.C., duranti paugas pa N da nha bebê mama, N ba ta kunpanha kuzas ki staba ta kontise na nha sidadi:

Ku mon unidu ta reza na un sírkulu inter-rilijiozu na St. Paul's...létras brilhanti iluminadu na tijolus di Old State House...Kartás ki fazedu na kaza, labantadu entri multidon na City Hall Plaza: “Nu sta ku imigrantis”, “Nhos lugar é li”, “Nos é un sidadi di imigrantis”, “Boston ka ta rende”.

Nos é un sidadi undi ki kafê irlandês é fórti, y nos opinions inda é más fórti. Pode ser ki nen sênpru nu ka ta konkorda ku kunpanheru, má nos é un família...

Si bu ataka un di nos, nos tudu ta difende.

Nos é un sidadi ki sabe ma nos forsa sta na kunpanheru: Y nu ta difende nos gentis ku tudu nos forsa.

Óra ki pézu di mundu kai riba nos, Boston ta labanta.

É pur kauza d'es kumunidade—y di trabadju ki dja nu faze djuntu—ki N konsigi labanta nha mon direitu, faze un juramentu, y fla nason verdadi: Ma Boston é maior sidadi di mundu.

Nos é un sidadi ki ta valoriza trabadju ixforsadu—undi ki menbrus di **UNITE HERE Local 26** konsigi un kontratu úniku a nível nasional, pa trabadjadoris di otelaria y ristorason, ki ta dinamiza setor di turismu di Boston, xinti ma un inpregu dja txiga...

Nos é un sidadi ki ta prumove inovason—undi ki sientistas di **Vertex** inventa un ramédi ki ta ten opioidi pa konbate dor y un epidemia...

Nos é un sidadi konsentradu na aspétus fundamental di dia-dia—ta tapa 15.000 braku...ta korta fita na 20 parki y parki infantil...ta planta más di 5.000 arvi y alarga sirvisus di bibliotéka en 10.000 óra...ta konserta más di 30 milha di paseius y 60 milha di stradas.

Nos é un sidadi undi ki kaxoru kenti y *raspberry lime rickeys* di **Sullivan's** é dignu di prémiu James Beard, y undi ki mininus ku nómi sima **Ayo** y **Jeremy** di Dorchester y JP ta kria pa ganha Emmys y Tonys.

Nos é un sidadi ki ta intxi ruas óra ki nos ekipas ta trae un trofeu pa kaza:

Parabéns pa ekipas di Charlestown y New Mission, kanpions stadual di basketibol maskulinu; ekipa di luta libri femininu di Josiah Quincy; ekipa di ókei maskulinu di Boston Latin; y ekipa di beizibol di English...Y **Boston Celtics** é bon tanbe!

Y, djuntu ku nos sokoristas, trabadjadoris di linha di frenti di saúdi públiku, líderis rilijiozu, y parserus na tudu zóna, dja nu kontribui pa Boston ser sidadi grandi más siguru d'es país.

Kuatu anu atrás, violénsia armadu na Boston atinji un másimu di dés anu. Tudu anu désdi ki nu toma pósi, nu stabelese nóvus mínimu stóriu...Obrigada pa **Kumisáriu Michael Cox** y Dipartamentu di Pulisia di Boston (Boston Police Department) interu.

Ku nhos lideransa, pulisiamentu kumunitáriu atinji un nóvu nível di konfiansa...sentradu na siguransa y na kualidadi di vida na Downtown y na tudu zóna. Nu rikruta turmas más grandi y más diversifikadu di nóvus ajenti na Academy (Akademia), y nu stabelese padrons nasional di risponsabilizason y rifórma atravês di kontratu di pulisia: Na final d'es anu li, moradoris di Boston ta ser formadu komu sinalizadoris sivil pa priméru bês, y ganha un bon saláriu enkuantu es ta mante-nu siguru.

Kuatu anu atrás, disparidadis rasial na saúdi dja agravaba. Oji, Kumison di Saúdi Públiku di Boston (Boston Public Health Commission) sa ta faze prugrésu na konbate kes disparidadi la, atravês di un intirvenson sentradu na overdózi di drógas, saúdi infantil y matérnu, y duénsas króniku. Obrigada, **Dr. Bisola Ojikutu** y tudu nos parserus di ekuidadi na saúdi.

Kuatu anu atrás, stabelesimentus kumersial sima **Eli Lilly, S-A-P, Roche, LEGO**, y **NVIDIA** (en-vih-dee-uh) éra sediadu na otus sidadi. Oji, es tudu dja skodje Boston.

Pa mante es dinamismu, es noti N sa ta anunsia ma Kámara Munisipal sa ta ben lansa un Gabeti di Rikrutamentu di Inprezas (Business Recruitment Office) pa prenxe vagas kumersial, mante y atrai taléntus, y kontinua ta stimula Downtown. Obrigada pa nos Ekipa di Trabadju di Rikrutamentu di Inprezas (**Business Recruitment Task Force**) y Grupu di Trabadju di Inpregadoris di Boston (**Boston Employer Working Group**) pamódi ses parseria ku nos, pa Boston bira midjor lugar di faze negósiu.

Kuatu anu atrás, Boston tinha sô alguns spasu ki dónus éra Prétu, pa kumunidadi riuni y konvive. Désdi ki nu toma pósi, kes spasu la dja aumenta pa más di ki dobru: Désdi **Grace by Nia** na Seaport, **Hue** na Back Bay, y **Park 54** na Hyde Park, a **the Mix** na Dorchester, y **Jazz Urbane** ki ta abri n'es veron, pértu di **Soul & Spice** na Nubian Square. Obrigada pa tudu nos enprendedoris ki sa ta invisti na Boston.

Y ku lideransa di Konseilhu Munisipal (City Council) y di Palásiu di Guvénu Stadual (State House), nu akresenta maior númeru di nóvus lisénsa di bebidas alkóliku désdi *Prohibition*: 225, nóvus opurtunidade pa ristoranti di zónas kria inpregu, ilimina bareras y konstrui kumunidades.

Kuatu anu atrás, Kámara Munisipal ka staba ta faze sforsu sufisienti pa apoia stabelesimentus kumersial diversifikadu. Sô na último anu, dja nu atribui más di 150 milion di dóla en kontratus munisipal pa stabelesimentus kumersial ki dónus é pesoas di kor—más di dobru di valor di 2021.

Y kuatu anu atrás, studantis-atléta di BPS dexadu ku un infraestrutura disportivu ki kuazi nunca ka ta staba abértu y dja tinha kuatu dékada en ruínas. Oji, nu sa ta re-mudela White Stadium, ta transforma-l na un séntru disportivu di nível mundial, garantidu pa studantis, trenadoris y moradoris di BPS 15 óra pur dia, más di 345 dia pur anu... Y nunca N ka ta pára di luta pa kel ki jóvens di nos sidadi merese. Obrigada pa tudu nos trenadoris, studantis y difensoris, y **Franklin Park Coalition** pa ses orientason.

Na últimos kuatu anu, dja nu mostra es país kuzê k'é konstrui un ekipa ki ta rifleti nos kumunidades—y konstrui un bázi pa infrenta dizafius ki ningen ka pensaba ma éra pusível.

Djuntu, dja nu mostra mundu ma é pusível konstrui un sidadi siguru, ekolójiku y en kresimentu—un lar pa tudu algen—si nu ka dizisti.

Oji, Boston sta más fórti, más ditirminadu y mós orgulhozu di ki nunca di ser kenha ki nos é...nun mumentu en ki nu meste kunpanheru...y nos nason meste Boston.

Purisu, es noti li N pode fla ma Stadu di nos Sidadi é fórti...y nu ten ki ser.

Pamódi na país interu, pesoas sa ta xinti pézu di un administrason federal ki sa ta ataka nos fontis di forsa—kes mésmu pesoa y prupóztu ki ta kontribui pa Boston ser grandiozu:

Funionários públiku y veteranus...imigrantis y kumunidade LGBTQ+...kes instituison ki ta faze piskiza inovador y ta presta kuidadus ki ta salva vidas.

Nu ten kes midjor ospital, fakuldadis y universidadis, kes midjor laboratóriu y séntrus di piskiza d'es país—é es ki ta inpulsiona nos ikunomia, ki ta da nos

moradoris trabadju, y ta kontribui pa Boston ser mutur di inovason di Mérka. Y, oji, es tudu sa ta ser atakadu.

Boston é un alvu n'es luta pa nos futuro, pamódi nos é bérsu di dimokrasia, pionerus di ben públiku, prutetoris y guardions di Sonhu Merkanu. Nu foi konstruídu di akordu ku kes valoris ki es administrason federal sa ta tenta distrui.

Má, duranti 395 anu, ku marê altu ô ku inférnu—ka inporta kenha ki amiasa traze-l — Boston ben ta difende kes pesoa ki nu ta ama y kel país ki nu konstrui. Y, nu ka sa ta pára gósi.

Pa nu ser un lar pa tudu algen, nu ten ki ser midjor sidadi pa famílias, y inda ten más trabadju pa faze.

Désdi ki nu toma pósi, dja nu djuda más di 850 morador na kunpra ses priméru kaza. Dja nu konstrui más di 11.000 nóvu unidadi, y kazas más ikunómikamenti asesível (más baratu) na últimus pelu ménus 25 anu.

Na últimus trêns anu, nu tra más di 700 kaza di merkadu spekulativu y nu transformá-s en kazas permanentimenti di baxu kustu.

Na simana pasadu, N bai atxa **Sra. Annie** na Fairlawn Estates, na Mattapan—undi ki dj'el ten sinkuénta anu moradu. Y na últimus sais anu, el lidera se asosiason di renderus na luta kóntra auméntu di rénda y dispeju ku objetivu di jentrifika se kumunidadi—y el ganha.

Djuntu, ku CityLife/Vida Urbana, Related Beal, y nos parserus di Fundu di Akizison di Abitason (Housing Acquisition Fund), nu konsigi pruteje tudu kes 347 kaza y transformá-s en kazas permanentimenti di baxu kustu. Sra. Annie y família di Fairlawn sta li es noti!

Tanbe, nu sa ta trabadja ku prumutoris imobiliáriu pa konverte spalus di skritóriu dizokupadu en más kazas pa famílias. Ti prósimu veron, nu ta tene 1.000 nóvus kaza en konstruson na séntro di Downtown.

Es noti li, N sa ta anunsia ma nu sa ta alarga es prugrama di konverte spalus di skritóriu en kazas, y nu sa ta leba-l pa universidadis y inpregadoris ki kre re-ativa prédius di skritóriu y transformá-s en durmitórius ô alojamentu pa trabadjadoris.

Nu ka sa ta popa sforsu pa konstrui, prizerva y re-inventa abitason na sidadi interu.

Manhan, nu ta lansa nos priméru **Planu di Ason Kóntra Mudansa Forsadu (Anti-Displacement Action Plan)**, pamódi kresimentu di Boston debe estabiliza famílias y aprofunda ses raís.

Tanbe, N ten orgulhu di anunsia lansamentu di **Prugrama Pilotu di Kó-Kónpra (Co-Purchasing Pilot Program)** (kunpra kaza djuntadu):

Djuda agregadus familiar konbina ses puder di kónpra pa kunpra kazas multifamiliar ku kréditus diferidu ku 0% di jurus di Kámara Munisipal.

Na txeu kaza — inkluindu di-meu — famílias di várius jerason ta mora baxu di mésmu tétu. Kó-Kónpra pode fasilita kónpra di un kaza, y kumê djuntu y konvive ta bira un párti integranti di vida:

Ami N kria milharis di kilómitru lonji di nhas avó; N konxeba es prinsipalmenti atravêš di invilópis burmedju na Anu Nóvu y xamadas di longu distánsia. Oji, nhas fidju ta konsigi kria ku ses avó na andar di baxu, invêš di es sta siparadu pa un osianu.

Midjor sidadi pa famílias debe fasilita pa bu mora pértu di pesoas ki bu kre txeu.

Má, un monti d'algen ka ten dinhéru pa kuida di ses família: Na Massachusetts, kréxi y pré-skóla privadu pode kusta 2.000 dóla pa mês, pa kada kriansa.

Má, manhan di sédu, na Boston interu, serka di 5.000 kriansa di trêš y di kuartu anu di idadi, ta bai pa salas di aula na skólas primáriu, na séntrus kumunitáriu, y na kazas — pa ensinu pré-skolar di grasa.

Komu mai, y komu Prizidenti di Kámara, pa mi é un prioridadi aumenta es prugrama tudu anu désdi ki nu toma pósi—akresentandu más di mil vaga nóvu pa nos alunus pikinóti.

Pa kuida di bu família, Boston ta ser kel aldeia nisisáriu.

Kónta di inerjia (lus) más karu tanbe ta afeta orsamentu di famílias. Purisu, nu pruveta nos puder di kónpra kuletivu pa ofereše inerjia di baxu kustu y linpu, atravêš di **Boston Community Choice Electricity**—pa popa moradoris y stabelesimentus kumersial más di 260 milion di dóla.

Má, si bu kaza ka sta ben izoladu....bu ta uza akesedor ilétriku...ô un kaldera antigu...bu ta gasta dinhéru dimás pa akese bu kaza.

Purisu, es noti, N sa ta anunsia **Boston Energy Saver**: Un nóvu parseria stóriku ku Eversource y National Grid ki ta ben dispunibiliza más di 150 milion di dóla en finansiamentu di stadu pa nos moradoris, pa es midjora ses kaza y diminui ses kónta. Si bu méste jénelas nóvu ô un sistéma di akasimentu atualizadu, nu ta djobe tudu dinhéru dispunível pa djuda.

Y, komu prédius é maior fonti di imison di nos sidadi, apartir d'es veron, tudu nóvu prédiu grandi di Boston ta ten nível zéro di imison désdi inísiu.

Nos lideransa klimátiku sa ta kontribui pa kazas más ikunómikamenti asesível, prédius grandi más ekolójiku, y sa ta kria opurtunidades pa jóvens sima **Slader**—ki staba ta mora na un abrigu kuantu anu atrás. El ben pa Mérka di Aiti, el sai di kaza ku 18 anu, y el kaba pa fika moradu na rua.

Oji, **Slader** é injinheru na un prédiu na Downtown—un trabadju ki el konsigi atravêš di programa di inpregus ekolójiku di Kámara Munisipal ki txoma **Boston PowerCorps**. Y, es anu, nos nóvu mon-di-óbra kulaborativu ta kumesa formason di más 1.200 morador, pa konstrui litoral y kumunidades más rizilienti.

Midjor sidadi pa famílias debe da prioridadi a prugramas ki ta popa dinhéru di famílias, ta mante-nu tudu saudável, y ta pripara nos jóvens pa erda maior sidadi di mundu.

Y, na sidadi ki kria ensinu públiku, nu ten ki stabelese nórmaz pa otus kunpri. Inda nu ka txiga la, má oji nos skólas públiku sta na kaminhu sértu, y sa ta ganha forsa:

Matríkula na BPS sa ta aumenta pa priméru bês na dés anu. Taxas di konkluzon di liseu dja aumenta, taxa di faltas króniku dja diminui, y rizultadus di risponsabilizason di nos stadu mostra prugrésu signifikativu. Y nu sa ta toma disizons difísil, má nisisáriu, pa dimensiona nos distritu kurétamenti y sirbi nos alunus di midjor manera.

Es anu letivu, pa priméru bês, famílias pode kunpanha viajens di ses alunus na otokaru, y BPS finalmenti dja tene dadus ki ta mostra ki alunus ki ta viaja na otokaru na kada dia. Atualmenti, nu ten média di 94% di otokarus ki ta txiga na óra, y nu sa ta ben toma más midida pa midjora rótas es anu.

Atualmenti, kuazi tudu skóla ta faze rifeison saudável na lokal, ku ingradientis ki ta ben di propriedadis agríkula di Massachusetts, pa nos alunos pode tene inerjia pa konsentra y prende.

Y nos idukadoris di BPS é kanpion di stadu tanbe: Es ganha prémiu di midjor Diretor-Adjuntu, midjor Orientador Skolar y Prufesor di Anu na Massachusetts.

N ten orgulhu di informa ma, ónti noti, nu txiga un akordu pruvizóriu di três anu ku Sindikatu di Prufesoris di Boston (Boston Teachers' Union).

Infermerus di skóla, orientadoris y idukadoris ta dizenpenha alguns di kes trabadju más inpurtanti na nos sidadi. Obrigada pamódi nhos kontinua ta da prioridadi a nos alunos tudu dia.

Y, da prioridadi a nos alunos signifika invisti na parserias ki ta prepará-s pa susésu:

Es outonu li, priméru turma alargadu di 200 alunu di nonu anu ta kumesa ta frikuenta **Edward M. Kennedy Academy for Health Careers**, grasas a un subsidiu di \$38 milion di dóla di **Bloomberg Philanthropies**, pa kria un parseria pioneru a nível nasional ku **Mass General Brigham**...

Tanbe, N kre agradese **UMass Boston** pamódi es spandi kuzê k'é pusível pa alunos na **Ruth Batson Academy** ki ta fika pertinhu...Y, obrigada pa **Martin Richard Foundation**, Dorchester Field House ta ser inauguradu la prósimu mês.

Es anu, tanbe nu sa ta ben faze un parseria ku **WPS Institute**, pa garanti ma alunos di 7º y 8º anu ta sta preparadu pa pruveta másimu di liseu...nu sa ta trabadja ku **Bain** pa ríforsa kaminhus inisial pa universidadi...y nu sa ta djunta ku inpregadoris pa triplika tamanhu di prugrama koperativu na **Madison Park**, pa alunos pode konsigi kréditus y un saláriu mésmu ténpu.

Nu sa ta poi nos jóvens en kontaktu ku un idukason ixsilenti y abranjenti: studu akadémiku rigurozu, kursus y trabadju na veron, atividadis éxtra-kurikular enrikisedor, disportu pa studantis, y asésu a artis.

Es anu letivu, aprendizajen kumesa lógu ki último anu letivu finda:

Nu bate nóvus *record* di alunos matrikuladu na aprendizajen di veron di 5º Triméstri y di trabadju di veron remuneradu; y nu da más di 3.000 aula di bisikléta, di grasa, y 6.000 aula di natason, di grasa.

Nos ekipa di Sirvisus Umanu djuda finansia ekipamentu y taxas na 55 organizason di disportu juvenil, garantindu ma pagamentu ka ta ser un barera pa jóvens ki kre juga.

Y nu sa ta muda un rialidadi ki é—pa un monti di alunu—prugramas di matimátika, siénsia y teknolojia dipos di aula, é karu dimás ô ta fika lonji dimás.

Miguel é un alunu di 6º anu na **Holmes Innovation School**: el ta pratika atletismu, el ta juga basketibol, y el kre ser pilotu un dia. El sabe ma pilotus ta meste sabe matimátika pa kalkula kuzas sima planus di vou y aterajens di imerjénsia. Má, Holmes atualmenti ka ten prugramas di matimátika dipos di aula.

Es noti, N ten prazer di anunsia ma nu sa ta kria un nóvu konjuntu di prugramas di Matimátika Avansadu déntu di Skólas Públiku di Boston (Boston Public Schools)!

En parseria ku **Young People's Project** y **Calculus Project**, nu sa ta lansa klubis di matimátika, konpitisons y kumunidadis di matimátika avansadu, pa alunus sima **Miguel** sabe ma es merese sta na kursus di matimátika avansadu.

En rilason a arti, anu pasadu, 50.000 alunu y ses familiaris vizita un muzeu di Boston, di grasa—milharis d'es pa priméru bês—atravêš di nos prugrama ki txoma Boston Family Days.

Es anu li, nu sa ta akresenta lugaris Rivulusionáriu di Boston—Paul Revere House, Old North Illuminated, Old State House, Old South Meeting House, y USS Constitution, y tanbe nos instituisions di artis séniku más inpurtanti: ArtsEmerson, The Boch Center, Wheelock Family Theatre, Huntington Theatre, Boston Lyric Opera, Boston Symphony Orchestra, y Boston Ballet. Obrigada pa nos parserus fantástiku, ki djuda pa tudu kel-li ser pusível!

Y, es noti, N sa ta anunsia lansamentu di **BCYF Creates**, un invistimentu na prugramason artístiku di grasa, ki ta ben aumenta ensinu di artis na nos sêntrus kumunitáriu, pa más di dobru.

Purtantu, si bo é un studanti ki tene vontadi di splora stória di nos país, sisti un spetákulu, sprimenta un nóvu disportu, ô entra na un ekipa di matimátika, bu meste sô...mora na Boston.

Y na Boston, ser midjor sidadi pa famílias signifika apoia familiaris di tudu jerson.

Na segunda-fera, N selebra Dia di S. Patrick (St. Patrick's Day) na Séntru di Idozus di East Boston (East Boston Senior Center). Enkuantu nu staba ta kumê karni enlatadu y kobi, un avó ki txoma Judy fla-m ma, dipos ki se maridu móre, el fika ta trabadja di guarda di tránzitu, pamódi el ta fika más animada — ker na txuba, na sol ô na névi — óra ki el ta odja surizu di alunas ta bai y ta ben di skóla. Óra ki el ka sta na kel trabadju, el ta pasa témpu ku amigus na séntru di idozus.

Pa moradoris sima **Judy**, djuntu ku **Ethos** y nos parserus na stadu, nu sa ta akresenta más un dia pur simana na prugramason pa idozus la na **Elks**, na West Roxbury, y nu sa ta akresenta nóvu prugramason pa idozus na sinku zóna es veron li.

Y, mi ku Konselhu Munisipal (City Council), nu sta ansiozu pa trabadja ku Palásiu di Guvénu Stadual (State House), Guvernador, y Senadu Stadual pa finalmenti aprova nos prujétu di lei, pa riduzi inpostu di moradoris y mante idozus na ses kaza.

'Nos idozus é stória bibu di Boston—es ta mostrá-nu kuzê ki signifika vive ku alegria na kumunidade, y ku riziliénsia na meu di tudu dizaflu ki dja nu infrenta djuntu.

Dos mês atrás—(ki ta parse sima ki foi dos anu atrás),— N traze nha fidju fémia pa es mundu.

Na verdadi, é ka kel mundu li ki N sa ta speraba nen ki N ta dizejaba pa el.

N kre pa el kria na un país ki otus ta admira, y nau ki otus ten médu. Un país stável y siguru, nau un país ki sa ta parse ma sa ta kai padás padás.

N kre pa el kria na kel Mérka ki Paul Revere kavalga pa el...ki Dr. King marxa pa el...ki nhas pais dexe ses país pa ben.

É kel mésmu Mérka ki nos líderes rilijiozu na St. Paul's djunta mon y reza pa el...y ki povu di Boston djunta y luta pa el...tudu jerson, duranti 250 anu.

É kel verson di Mérka ki ta pertense nau a reis, má a parentis, undi ki trabadjadoris ten dignidade, y undi ki siénsia é rial. Undi ki é pusível sai di vida na rua pa bai trabadja na Downtown, y avizus di dispeju ta substituídu

pa xavi di bu priméru kaza. Undi ki inerjia é linpu y ikunómikamenti asesível, y kes midjor lugar é di grasa pa tudu algen; undi ki tudu skóla ten rikursus y parserias pa dizafia tudu alunu, y tudu alunu ten spasu pa krese y pa kria.

Bon notísia é ki: É kel Mérka la própi ki nu sa ta konstrui na Boston.

Purisu, enbóra es mumentu nasional é ka kel ki mi—y txeu família—ta kreba, N ta xinti gratidon pamódi nha fidju fémia pode fla ma es sidadi é di-sel.

Boston é ka un sidadi ki ta tolera tirania.

Nos é kel sidadi ki ta lidera na tenpestadi; ki ta labanta djuntu óra ki nu prisionadu; y ki ta atxa forsa na kunpanheru. Nu ta difende nos gentis ku tudu nos forsa.

N ka ta pode pidi más di un família.

Deus abensua nos Sidadi, Deus abensua nos povu, y Deus salva kenha ki mexe ku Boston.